

Gryphius, Andreas: Eh' als der ernste Gott mitt plitz vnd schwefell regen (1640)

- 1 Eh' als der ernste Gott mitt plitz vnd schwefell regen
- 2 Mitt fewer pech vnd sturm hatt Sodom vmbgekehrt
- 3 Eh' erd vnd Himmel kracht vor seines eyvers schwerdt/
- 4 Eh' als er Zeboim lies in die asche legen;
- 5 Eh' als die heisse lufft erklang von donnerschlägen;
- 6 Eh' er auff Adama sein rüsthauß außgelert
- 7 Eh' als Gomorrha noch von flammen auffgezehrt;
- 8 Mus Loth mitt Weib vnd Kind von dannen sich bewegen.
- 9 In dem der brandt entsteht/ vnd sein besturtzt gemahl
- 10 Mitt vmb gekehrten aug erblickt wie vber all
- 11 Mitt loh' vnd lichter glutt die häuser sind gekrönet;
- 12 Fühlt sie das threnen saltz aus ihren augen rint/
- 13 Vnd sie/ sie selbst wirdt saltz. Vnd ehr sie sich besinnt/
- 14 Ist durch die weise straff ihr vorwitz ausgesöhnet.

(Textopus: Eh' als der ernste Gott mitt plitz vnd schwefell regen. Abgerufen am 23.01.2026 von <https://www.textopus.d>